

Mensahe 3

Ang Dios-tawong Pagkinabuhi alang sa Bag-ong Pagkadasig Pag-usab

Basahong Kasulatan: Lev. 1:3, 9; 6:8-13; Juan 21:15-17;
1 Juan 3:14; 5:1; 2:6; 4:17; Gal. 6:2-3; Rom. 8:2

- I. Ang tinguha sa kasingkasing sa Dios mao nga ang “naa ni Jesus ang realidad” (Efe. 4:21), ang aktwal nga kahintang sa Dios-tawong pagkinabuhi ni Jesus ingon sa nasulat sa upat ka Ebanghelyo, mahulad diha sa daghang bahin sa Lawas ni Cristo pinaagi sa Espiritu sa realidad aron mahimong realidad sa Lawas ni Cristo, ang kinahabogang punto sa pamatigayon sa Dios, alang sa bag-ong pagkadasig pag-usab (vv. 20-24):**
- A. Gipakita sa upat ka Ebanghelyo ang sumbanan sa kinabuhing gitinguha sa Dios, ang hulmahan sa kinabuhing makatagbaw sa Dios ug makatuman sa Iyang tuyo; nagkinabuhi si Jesus nga nagbuhat sa tanan diha sa Dios, uban sa Dios, ug alang sa Dios; naa sa Iyang pagkinabuhi ang Dios, ug nausa Siya sa Dios; kini ang gipasabot sa *naa ni Jesus ang realidad*; ang makat-on ni Cristo ingon nga naa ni Jesus ang realidad kana mang mahulma sa sumbanan ni Cristo, masama sa dagway ni Cristo—Rom. 8:28-29; Efe. 4:20-21.
 - B. Kamulo tang gihingpit sa Ginoo aron mahimong mga Dios-tawo, nga nagkinabuhi sa diosnong kinabuhi sa pagdumili nato sa atong natural nga kinabuhi segun sa sumbanan ni Cristo nga unang Dios-tawo—Mat. 11:29a; 17:5b; 1 Ped. 2:21:
 - 1. Sa pagkinabuhi Niya dinhi sa yuta naghimo Siyag sumbanan, ingon sa gipadayag sa upat ka Ebanghelyo; unya gilansang Siya sa krus ug nabanhaw aron mahimong Espiritu nga taghatag-og-kinabuhi aron makasulod Siya nato ug mahimong atong kinabuhi; nakat-on ta Niya sumala sa Iyang panig-ingnan, dili pinaagi sa atong natural nga kinabuhi kondili pinaagi Niya nga atong kinabuhi diha sa pagkabanhaw—1 Cor. 15:45b; Col. 3:4.
 - 2. Ang Cristohanong kinabuhi nato kinabuhi nga naa ni Cristo ug kinabuhi sab ni Cristo sa sulod nato; naa ta ni Cristo nga hulmahan, ug naa Siya nato ingon nga atong kinabuhi; sa ingon niini makat-on ta ni Cristo maingon nga naa ni Jesus ang realidad; kining realidara mao ang realidad sa Lawas ni Cristo—1 Cor. 1:30; 2 Cor. 5:17; 12:2a; Col. 1:27; Gal. 2:20; Rom. 8:10.
 - C. Sa mahigugma ta sa Ginoo, mokontak Niya, ug moampo Kaniya, diha-dayong ikinabuhi nato Siya segun sa hulmahan, porma, sumbanan, nga gihulagway sa Mga Ebanghelyo; sa ingon niini gihulma, gipasama ta, sa dagway ning hulmahan—kini ang gipasabot sa makat-on ni Cristo—Mat. 11:29; Rom. 8:29.
 - D. Kon magkinabuhi ta diha sa nasagol nga espiritu, nagkat-on ta ni Cristo segun sa realidad nga naa ni Jesus pinaagi sa Espiritu sa realidad; makat-on ta Niya nga atong sumbanan aron mahimong kasaysayan nato ang biyograpiya Niya; ang pagkinabuhi sa Lawas ni Cristo nga bag-ong tawo sama gyod unta sa pagkinabuhi ni Jesus nga gipadayag sa Mga Ebanghelyo—Gal. 6:17-18; Rom. 1:1, 9; Efe. 4:20-24; Fil. 2:5; Mat. 11:29; 1 Ped. 2:21.
 - E. Ang tuyo sa Dios sa pagpadala Niya ni Ginoong Jesus aron mahimong tawo para man magkinabuhi Siya sa Dios-tawong kinabuhi pinaagi sa diosnong kinabuhi; mokaon ngani ta Niya, mabuhi ta tungod Niya aron mahimong malukopong dakong tawo nga sama gyod Niya—tawo nga nagkinabuhi sa Dios-tawong

kinabuhi pinaagi sa diosnong kinabuhi—Lam. 3:22-24, 55-56; Bug. 2:4, 7; Juan 6:57, 63; Jer. 15:16; Efe. 6:17-18; Sal. 119:15.

II. Ang bugtong kinabuhi nga makapahimuot sa Dios mao ang kinabuhi nga pagsubli sa kinabuhing gikinabuhi ni Cristo dinhi sa yuta; kini ang kinabuhing nagsinati ni Cristo sa mga kasinatian Niya isip halad nga sinunog—Lev. 1:9; Juan 8:29; 2 Cor. 5:9:

- A. Naghulagway ni Cristo ang halad nga sinunog sa pagkinabuhi Niya sa kinabuhing bug-os gyong alang sa Dios ug sa pagtagbaw sa Dios; naghulagway sab ni Cristo ang halad nga sinunog sa pagka-kinabuhi Niya nga nakapakinabuhi sa katawhan sa Dios nianang pagkinabuhia—Lev. 1:3; Num. 28:2-3; Juan 5:30; 6:38; 8:29; Heb. 10:5-10.
- B. Ang pulong nga gihubad og “halad nga sinunog” nagpasabot og butang nga mosaka; nagpasabot ni Cristo kining pagsaka (Lev. 1:3, 10, 14); ang bugtong makasaka ngadto sa Dios gikan sa yuta mao ang kinabuhing gikinabuhi ni Cristo, kay Siya man ang bugtong-talagsaong tawo nga nagkinabuhi sa kinabuhing bug-os gyong alang sa Dios (Juan 6:38).
- C. Ang halad nga sinunog “kahumot nga makatagbaw ni Jehova” (Lev. 1:9); ang Hebreohanong mga pulong nga gihubad og “kahumot nga makatagbaw” linetrang nagpasabot og “alimyon sa pahulay o katagbawan”; ang kahumot nga makatagbaw alimyon nga nagdalag katagbawan, kadait, ug pahulay; pagpahimulos sa Dios kanang makatagbaw nga kahumot.
- D. Ang kinabuhi ni Cristo sa sulod nato mao ang realidad sa halad nga sinunog—kinabuhi kini sa pagsugot, kinabuhi sa pagpasakop, ug kinabuhi nga hingpit nga nagsalig sa Dios segun sa prinsipyo sa kahoy sa kinabuhi—Fil. 2:8; Juan 5:19, 30; Heb. 5:8; 10:7:
 - 1. Sala ang pagbuhat sa tawo nga nag-inusara ug nagkinaugalingon nga bulag sa Dios ug wala sa Dios; gusto ang Dios nga mobuhat ta segun sa Iyang mga gitudlo sa tanang butang—Sal. 40:7-8; 1 Juan 3:4.
 - 2. “Bisan kinsang dili modawat sa gingharian sa Dios sama sa gamayng bata dili gyod makasulod niini” (Luc. 18:17); gusto ang Dios nga masama ta sa gamayng bata sa tanang panahon kay gusto man Siya nga magsalig ta Niya sa tanang panahon; ang pagsalig-sa-kaugalingon mao ang kaaway sa pagsalig-sa-Dios.
- E. Sa pagtapion nato sa atong mga kamot ni Cristo nga halad nga sinunog nato pinaagi sa hustong pag-ampo, nadugtong ta Niya, ug nausa Siya ug kita; sa nagpuyo si Cristo sa sulod nato, gisubli Niya dinhi nato ang kinabuhing gikinabuhi Niya dinhi sa yuta, ang kinabuhi sa halad nga sinunog—Lev. 1:4; 1 Cor. 6:17; Gal. 2:20.
- F. Nianang pagkausaha, kun pagkahiusaha, gipangako Niya ang tanan natong kaluyahon, mga apan, ug mga sayop—2 Cor. 5:21; Gal. 2:20a.
- G. Magpasunog gyod ta sa Ginoo aron mahimo tang mapadayonon nga halad nga sinunog nga mosunog sa uban ug mahimong mga abo aron mahimong Bag-ong Jerusalem nga magpadayag sa Dios—Sal. 20:3; Lev. 1:16; 6:8-13; 1 Cor. 3:12a; Bug. 3:12; 21:2, 10-11, 18-21:
 - 1. Nagtimaan ang mga abo ni Cristo nga gihimong balewala; kay nausa man ta sa Cristo nga nahimong abo, mahimo sab tang mga abo, sa ato pa, mahimong wala, siro—Mar. 9:12; Isa. 53:3; 1 Cor. 1:28; 2 Cor. 12:11.
 - 2. Labi tang mausa ni Cristo sa Iyang kamatayon, labi sab tang makaamgo nga nahimo na tang bungdo sa mga abo; sa mahimo na tang mga abo, dili

na ta natural nga tawo; tawo hinuon ta nga gilansang na sa krus, gitapos, gisunog—Gal. 2:20a.

- H. Ang pagbutang sa mga abo dapit sa silangan sa halaran, sa dapit nga subangan sa Adlaw, nagpasabot sa pagkabanhaw—Lev. 1:16; Juan 11:25; Fil. 3:10-11; 2 Cor. 1:9:
 - 1. Kalabot ni Cristo nga halad nga sinunog, dili kataposan ang mga abo—kini ang sinugdan; nagpasabot ang mga abo nga gipatay si Cristo, apan nagtimaan sa pagkabanhaw ang silangan—Mar. 9:31.
 - 2. Labi ta nga mahimong abo diha ni Cristo, labi sab tang mabutang sa silangan, ug sa silangan duna tay kasegurohan nga mosubang ang Adlaw ug nga makasinati ta sa pagsubang sa pagkabanhaw—Fil. 3:10-11.
- I. Sa kataposan, mahimong ang Bag-ong Jerusalem ang mga abo—Bug. 3:12; 21:2, 10-11:
 - 1. Magtapos nato ang kamatayon ni Cristo, maghimo natong mga abo, ug diha sa pagkabanhaw mahimong bilihong materyales alang sa pagtukod sa Dios ang mga abo—1 Cor. 3:9b, 12a.
 - 2. Sa mahimo na tang mga abo, gidala na ta ngadto sa pagtransporma sa Tulo-usang Dios aron mahimong bilihong materyales alang sa pagtukod sa Bag-ong Jerusalem—Rom. 12:1-2; 2 Cor. 3:18; Bug. 21:18-21.

III. Sa pagtuman sa pagpangalagad sa Dios sa Bag-ong Tugon, si Ginoong Jesus, nga realidad sa halad nga sinunog, wala mobuhat og bisan unsa gikan sa Iyang Kaugalingon (Juan 5:19), wala Siya mobuhat sa kaugalingon Niyang buhat (4:34; 17:4), wala Siya mamulong sa kaugalingon Niyang pulong (14:10, 24), gibuhat Niya ang tanan dili sa kaugalingon Niyang kabubut-on (5:30), ug wala Siya magtinguha sa kaugalingon Niyang himaya (7:18); wala gyod Siya mahigawad kay natagbaw ra man Siya sa Dios (Isa. 42:4; 50:4-5; 53:2a; itandi sa Juan 4:13-14; 6:15; Mar. 9:7-8):

- A. Ang kinabuhi sa Ginoong mao ang buhat, lihok, ug pagpangalagad Niya; ang Iyang buhat maoy pagpangalagad Niya, ug ang Iyang lihok mao ang pagkamao Niya; diha Niya walay kalainan tali sa Iyang kinabuhi, buhat, lihok, ug pagpangalagad; gikinabuhi ni Ginoong Jesus ang Iyang pagpangalagad—itandi sa Luc. 22:26-27; Juan 10:10b; 1 Cor. 15:45b; 1 Juan 5:16a; 2 Cor. 3:6; Fil. 1:25.
- B. Tawong mainampoon si Ginoong Jesus; sagad nga moadto Siya sa bukid o mopahilit ba sa tago nga dapit aron mag-ampo—Mat. 14:23; Mar. 1:35; Luc. 5:16; 6:12; 9:28.
- C. Human sa milagro sa pagpakaon sa lima ka libo ka tawo, gipugos Niya ang mga tinun-an nga mobiya Niya aron duna Siyay dugang pang panahon nga tago nga moampo sa Amahan—Mat. 14:22-23:
 - 1. Nagbarog sa posisyon sa tawo (4:4), ang langitnong Hari, nga hinigugmang Anak sa Amahan (3:17), nagkinahanglan nga tagong moampo sa Iyang Amahan nga naa sa mga langit, aron mausa Siya sa Amahan ug maanaa Niya ang Amahan sa bisan unsang buhaton Niya dinhi sa yuta aron maestablisar ang gingharian sa mga langit.
 - 2. Gibuhat niya kini dili sa awaaw nga dapit kondili sa bukid, nibiya sa tanang tawo, bisan sa Iyang mga tinun-an, aron mag-inusara Siyang mokontak sa Amahan.
- D. Kay tawo man Siya nga mainampoon nga nausa sa Dios, wala gyod Siya mag-inusara, kay uban man Niya ang Amahan; matag gutlo nakita Niya ang nawong sa Iyang Amahan—Juan 5:19; 16:32; Sal. 16:7-8; itandi sa 27:8.

IV. Kon magpabilin ta diha sa gugma nga mao ang Dios mismo, “nahingpit na [ang gugma] nganhi nato, aron duna tay kaisog sa adlaw sa paghukom kay unsa ngani Siya, maingon man sab ta ning kalibotana” (1 Juan 4:17); si Cristo nga realidad sa halad nga sinunog nagkinabuhi ning kalibotana sa kinabuhi sa Dios nga gugma, ug kinabuhi nato Siya karon aron maka-kinabuhi ta sa samang kinabuhi sa gugma ning kalibotana ug masama Niya (3:14; 5:1; 2:6):

- A. Ang balaod sa Espiritu sa kinabuhi nga naa sa atong espiritu mao ang balaod ni Cristo nga balaod sa gugma (Rom. 8:2; Gal. 6:2); ipatinuod gyod sa balaod sa Espiritu sa kinabuhi ang balaod sa gugma aron makapas-anay ta sa mga luwan sa usag usa; apan kon natugob ta sa garbo, dili ta makapas-an sa mga luwan sa uban kay gilimbongan man nato ang atong kaugalingon sa paghunahuna nga si kinsa na ta nga balewala man unta ta (v. 3).
- B. Molihok na ngani sa sulod nato ang balaod sa gugma, awtomatiko ug diha-dayon nga mahimo tang mga magbalantay nga dunay mahigugmaon ug mapasayloong kasingkasing sa atong Amahan nga Dios ug sa maatimanon ug mapangitaong espiritu sa atong Manluluwas nga Cristo—Juan 21:15-17; Luc. 15:3-7.
- C. Molihok na ngani sa sulod nato ang balaod sa gugma, pagpangabudlay sa gugma ang pagpangabudlay nato diha sa Ginoo (1 Cor. 15:58; 1 Tes. 1:3) nga niini “supportahan nato ang mga maluyahon” (Buh. 20:35) ug “tabangan ang mga maluyahon” (1 Tes. 5:14); nagpasabot *ang mga maluyahon* sa mga maluyahon sa ila bang espiritu o kalag o lawas, o maluyahon ba sa pagtuo (Rom. 14:1; 15:1).
- D. Sa nabanhaw na ang Ginoo giatiman Niya si Pedro ug gitahasan siya nga pakan-on ang Iyang mga nating karnero ug atimanon ang Iyang mga karnero; pagtagik kini sa pagpangalagad sa mga apostol sa langitnong pagpangalagad ni Cristo aron atimanon ang panon sa Dios, ang iglesia, nga mosangpot sa pagtukod sa Lawas ni Cristo nga mahingpit sa Bag-ong Jerusalem aron mahuman ang walay kataposang pamatigayon sa Dios—Juan 21:15-17.